

Directora di Santa Rosa, sra. Natalie Maduro

“Awa ta un problema hopi grandi pa nos”

ORANJESTAD – Ayera directora di departamentu di Agricultura, Cria y Pesca conoci popularmente como Santa Rosa, sra. Natalie Maduro tabata masha satisfecho cu e actividad cu nan a organisa conhuntamente cu Biblioteca Nacional Aruba (BNA) en conexion cu Dia Internacional di Tera.

E tabata un actividad educativo cu a wordo celebra den e seccion di Arubiana Caribiana di BNA. Sra. Maduro a bisa cu esaki ta e prome biaha cu nan a haci esey hunto cu BNA.

Nan tin plania un serie di presentacion di diferente

charla educativo tur luna.

“Nos ta probecha awe pa haci tur hende consciente cu awa ta un problema hopi grandi pa nos”, el a bisa. Den cuadro di e fecha aki Santa Rosa kier haci tur hende consciente pa cuida e poco cu a resta di nos naturalesa pa e generacion cu ta bin despues.

Actividad

Sra. Maduro a bisa cu Dia Internacional di Tera ta un fecha importante pa nan comparti informacionnan, particularmente informacionnan cu nan no kier pa bay perdi. Nan a invita sra. Olinda Rasmijn di StimAruba cu a duna un charla riba importancia di nos mangelnan. Tambe nan a in-

vita personal di departamento di Naturaleza y Medio Ambiente y tambe expositornan manera sr. Emyl Kelkboom cu nan productonan herbal, y otro personanan cu ta traha productonan natural.

El a expresa su satisfaccion cu no solamente tabatin hende grandi sino studiantenan cu a pasa drenta y busca informacion. E ta spera cu e actividad aki hunto cu BNA lo por tuma luga anualmente.

Conscientisacion

Sra. Maduro a probecha e oportunidad aki pa haci tur hende consciente ya cu e aña aki ta aña di suela. El a agrega cu hopi biaha nos tin e tendencia di mal uza nos suela

cu hopi kimico.

“Nos kier resolve problemanan cu mata hopi lihe, mientras cu awendia tin productonan hopi mas organico”, el a declara na Bon Dia Aruba. E producto aki por tarda un tiki mas pa haya resultado pero e satisfaccion ta grandi cu bo suela ta wordo trata di forma mas natural posibel, el a bisa.

El a remarca cu Aruba ta un isla hopi chikito y nos tin cu cuida e poco terenonan di agricultura cu ta resta. Pero no solamente riba e tereno di agricultura, pero nan cas tambe. Santa Rosa ta estimulando nos hendenan pa ban cuida nos medio ambiente y special-



mente no tira sushi. E ta un preocupacion cu ta existi den nos comunidad riba e problematica di sushi y e damnan cu ta wordo uza como dumpnan. □